

Pan bintar, pinn khindarn



Foto vodar Giada von Galen

L'inverno è, nell'immaginario collettivo, sinonimo di freddo e neve. Un'idea che ci riporta alla nostra infanzia, alle battaglie di palle di neve, alle slittate e ai pupazzi costruiti con gli amici. Stare all'aperto fa parte della nostra tradizione ed ora è un consiglio dispensato dai pediatri di tutta Italia.

Disar bintar iz gest a bintar vo snea, odar pezzar khött "z iz a bintar vo snea" umbrómm, ånka az hatt ägeheft a pizzle zo eapra, da, ünsarne altn hám hërtä khött: "z iz dar martzo boda vazzt di pérng" un biar, soin lai in fevraro. "Z iz a

bintar vo snea, a bintar von khindarn; alle gedenkhpar balbar soin gest khlumma un hatt gesnibet.

Alle gedenkhpar di bintadar vo dise djar: dar hoach snea, di längen aiszökk boda soin abekhent von tèchar, un di baizan

beng boda di khindar hám genützt zo raita, schaungante böll au nèt zo machase seng: "pinn slit machtar 'z ais, un dena di altn läut slipfan un tüenan bea" hámса hërtä khött di baibar, ma an lestn hámса gelatt tüan, furse gedenkhante sélbart bia 'z iz gest schümma raitn.

Atz Lusérn di khindar soin hërtä gest gebönt zo stiana auz un in alt khindargart, sémme boda est izta dar Kultürinstitut, di khindar hám gehatt an gart o, zo lirna no vo khlumma zo arbata di earde, zo stiana tortemitt dar natùr, propio bia 'z iz gest 'z lem da atti pérng. Est anvëzte, hërtä meararne khindar pasärn di tang inngesperrt, "umbrómm 'z iz khalt, umbrómm 'z izta dar bint", furse umbrómm 'z iz déstar o lengse vorà dar televišióng. In di lestn djardar di dökhtür von Beleschlánt hám ägeheft zo khöda hoatar ke di khindar mochan stian auz in air, in di beldar, in di bisan un inn in snea o; 'z iz genümma lengse à gerécht, pitt baritt un hängas un lazzanse springen: ditza iz daz peste bobar alle mang tüan vor ünsarne khindarn.

Auzzalt di khindar stian pezzar un khemmen sterchar umbrómm pittar khelte di batteri sterm. Bar mang propio khön ke stian auz iz da peste kura zoa nèt zo darkräckha!

Giada von Galen

'Z iz zait zo höara au pinn “Fondi Odi”

Nati per aiutare i comuni montani della Regione Veneto e Regione Lombardia, confinanti con la Provincia Autonoma di Trento e di Bolzano, i “Fondi Odi” sono diventati, numeri alla mano, un'importante fonte di contributi, per lo più utilizzati in grandi opere.

"Eh, erändre lebet lai umbrómm dar vank 'z gëlt vodar Provintz vo Tria! Åna in sèll, beratar sa gestorbet alle!" Biavl vert habar gehöart khön asò? Daz meararste vo fremmege läut boda khemmen vo auz. I hànse gehöart i, vo au dom! In åndar tage, pinne gest zo flattar obar in Bisele, baldal allz in an stroach, pinne khent zo darvára vo dise "Fondi Odi" boda khemmen gëtt, opp un zuar, alln in kamöündar boda soin attn konfi pitt üs.

Beh, an earstn hänne pensart ke 'z berat o gest a schümma sachan, boda hettat gehelft in zimbar boda lem döpo in Térmar. An lestn, alle di zimbar soin hërtä gest arme läut, boda hám hërtä gekhempft, tage vor tage, zo giana vürsnen. Un anvëzte pinne darstanz zo höara söttane zifre.

An mildjü zo vornäügra di Kaberlaba vo Slege, a pista vor 'z gérait boda iz gelekk zirkä afti 1100 mètre über 'z mer, 8 mildjü hërtä zo vornäügra in Verena un in Aispark vo Roban, 750 tausankh öiro zo vornäügra in platz vo San Piaro. Eppaz njánka zo maga gloam! Alle di arbatn boda soin khent gemacht un boda bartn khemmen gemacht pitt dise Fondi Odi, makmase vennen gianante attn sito www.fondocomunicoinconfinanti.it. Un beraparz biar di sèllnen boda lem pinn kontribùtn?

Eppaz zo schemase! Azma pensart ke 'z iz a baila boma khempft pittar Provintz vo Tria zoa azta khemm gebeitart dar Las, un sait no da zo paita. Pittnan bege boda boll iz khent auzgerichtet ettlane vert ma, an lestn, iz asò eng ke in zèrte tokkng, mochtmase auhalthn pinn auto zoa zo macha pasärn di åndarn.

I vörtme ke, ka Tria, vil vert völlnsen 'z maul pitt börtar khödante ke ma mocht helvan in lendar von pérng, ke ma mocht helvan in zungminderhain. Ja, i sige boll bia sa helvanaz!

Lusérn, 'z djar 2018, hatt dikiarart an reddito pro-capite vo 15 tausankh un 268 öiro. Ummandar von ermarstn kamöündar vodar Provintz vo Tria un von gántz Nord-Est. Un att d'ändar sait von Térmar, sekma abevalln von hümbli gëlt un kontribùtn. Ma mocht gian ka Tria, pittnåndar pinn Bërsntolar, un hokn, auz von zenn, ke åna üsåndarn di Autonomi geat in krisi. 'Z berat djüst azta, dise Fondi Odi, khemmatn augetoalt pinn trianar un südtiolar kamöündar o, senónda geatma zo helva lai in raicharn un nèt in ermarn.

Est kheare bidrúmm in moi èst. Bar sengaz, liabe lusérn!

Dar Nachtvogl

Bi starch izta a saidenètz?

Una rete quasi invisibile ma con una resistenza straordinaria: è la ragnatela, un piccolo miracolo in seta della natura che, nonostante l'apparente fragilità, sarebbe teoricamente in grado di sollevare anche il peso di un'automobile.

Biavl vert habar gisek a nètz gimacht vonan vèschomgesprünst voll pitt groaze sbere trupfan reng un hámaz givorst bia 'z tüanda sòtt dünne dretla auzohalta da sèll sbere? 'Z hámseñ givorst di schientziètt o un soinda nà drauzaorbata sidar ettlane djar. Di nètzan gimacht von vèschomgesprünstar soin gimacht vo

zboa toal saide: ummana piglt un iz da sèll boda auhaltet di khlumman vichela boda draurivan un d'ändar iz gimacht vonar spetièll saide boda hoaz "dragline" (gespánntar drat) un boda iz asò zechat ke si mage haltn an drukh viar vert höachar baz dar stachl un iz o sèks vert ringar. Dar profésor Pugno vodar universitét



vo Tria vor a par djar hatt ägeheft durchzvüara an arbat z'sega bi starch 'z izta ditza saidenètz. Di arbat iz gibortet segante a vèschomgesprünst boda, nützante soi nètz, iz girift danidar vonan rais, hatt ägihenk 'z häusle vonan snèkk un hatt bidar ginütz soi nètz zo kheat bidrúmm atz rais. 'Z vèschomgesprünst iz gánt nidar un au merarne vert un alle di vert hatt ägihenk a näugez nètz in häusle, hërtä khürtzar baz daz sèll voránahi. Asò, nützante soi sbere 'z vèschomgesprünst hattz dartant azospànnha hërtä mearar dise dünne dretla un ziaga au 'z häusle vonan snèkk finn bo 'z hatt giböllt, zo magaz nütazn azpe èst.

Vodar arbat von profésor Pugno izta auzkhent ke vil dret saidenètz gilekk pittnåndar beratn guat zo heva an auto o. Furse nèt alln giavàltzen pensarn att vil nètzan vo vèschomgesprünst gilekk pittnåndar; 'z iz nèt eppaz déstar z'sega umbrómm 'z soinz nèt vichar boda lem pittnåndar, ma 'z djar 2007 izta khent giuntinet in Texas, in naturálpark affon sea Tawakoni, a gántz groazez nètz vo 180 mètre quadrat, gemacht vo vèschomgesprünstar vo zen famildje boda hám giarbaret pittnåndar zboa bochan zo maga machan a söttana arbat; kisàbettana sbere 'z magat auhahn!

E.v.K

Istituto Cimbro
Kulturinstitut Lusérn
Tel. 0464-78.96.45
info@kil.lusern.it
www.istitutocimbro.it



'Z geèzza vonar bòtta un vo haüt

La cucina di un tempo era più povera ma genuina. Oggi il superfluo può nascondere i sapori del passato.

In ta' vo haüt izta zèzza alladarsòt! Bar hámnan kartza vil o: geèzza boda khint vortgedjukht, 'z iz schade. Balma geat zo provédra boaztma nemár baz zo khoava: azma schaaget boda soin di biskött izta zo leganen di hent in har: pitt odar åna zükkar, pitt tschokolàta, gimacht azpi a stérndl, a hërtze, a röasle, pitt nüzzla, pitt marmelàda. Inar bòtta soinda gest di bratielln, hert un süaz, est soinda ploaz linne güätzla inngevült pitt allz. Un geabar nèt vürsnen pittar pasta, pinn ris, pinn öl. Dise djar izta geest biane zèzza un di läut soin gest arm. Berda hatt gihatt a khua, a goaz, zboa hennen, a par konédej un a gertle, iz gest a hear, asò in soi haus soinda gest: milch, vlaisch, öala, patàtn, gele rebla, salàtt. Berda hatt gihatt nicht hatt gehummart un hámnan gerialt di trippn!

Ma hatt gëzzt: ris pitt milch, muas gimacht pitt milch, bazzar, smaltz, súrcha un boatzamel un saltz; supp pitt radikkñ; petarläng gimacht pitt patatn, saltz, milch un vasöln; patatana pult; kavrítz gimacht pitt lugânegà, boatzamel, bazzar, saltz un fèffar; vröss un snèkkng; súrchanà pult pitt kraut, köstla un skodegi; smòrm gimacht pitt boatzamel, pråmpoi, milch, baiz von öale, öl, saltz, smaltz un zükkar; kröftela pitt öpfln.

Di khlumman khindar hám gëzzt in brobrosà gimacht pitt smaltz, boatzamel, bazzar un saltz.

I gedenkhmar moi nona boda hatt hërtä khött: oh...balde pin gest khlumma, azze hettat gihatt a naréntz! Inar bòtta da in länt soinda lai gest froumen un khërsan. Ma hatt augilest gegrés: khérndla, radikkñ, hummargekraüt.

Di sachandar boma hatt genützt zo khocha soin gest biane, ma 'z geèzza iz gest gesüntar. Di vichar soin khent augezügt pitt daz sèll boma hatt gihatt in haus odar in gart. Di khü hám gëzzt lai gras un höbe. In ta' vo haüt atz gegrés sprützansa alladarsòt, in vichar boaztma nèt bazzen gem zèzza!


Ma nützt ploaza zait zo khocha pitt daz sèll bodaz gitt di earde, ma an lestn iz allz pezzar!

S.F.

Dar aroplå

A quasi un anno da inizio pandemia, ho pensato che mi mancasse viaggiare e mi sono allora chiesto quale fosse la storia dell'aeroplano, il mezzo che ti permette di attraversare la terra in poche ore e di cui adesso non possiamo usufruire.

'Z iz ormài quèse a djar boda hatt ägeheft di pandemia von kräntzvirus un bobar mochta quindi quèse hërtä stian dahùam. I hán pensart att allz daz sèll bode pin gest gebönt zo tüana un daz sèll bode insorir daz meararste iz sichar viazàrn. Asò häninemar gevorst bia un benn 'z izta khent augemacht dar earst aroplå, boda fin haüt iz da peste un bahèmmegarste maniara zo mövrse afta gántz bëlt.



Dar earst aroplå, boda gelàicht a migele in sèllnen boda soin haüt, iz khent augemacht von prüadar Wright 'z djar 1903. Disar prototipo vo aroplå hatt gehoast Flyer, ke in inglese billtz munen "dar sèll boda flattart" odar o "dar pilota von aroplå", un iz khent gimacht flattarn in America. Dar motór vo disar earst aroplå iz gest vo 16 ross un da earst bòtta bodar hatt geflattart, izzarse geheft vodar earde vo 40 mètre un vor 12 seundi. Azpar pensarn bazta mage tüan est an aroplå, iz bintsche, ma vor di sèlln zaitn iz sichar gest sa eppaz guatz. In di djardar boda soin nakhent soinda khent gemacht hërtä pezzarne aroplé, boda hám gemak flattarn höachar un vor lengarna zait o. Laidar peró, disa naüga inventzióng, boda hatt parìt tüan lai guatz, in earst bëltkriage, iz khent genützt zo töata an hauf läut in di bombardamenti (in zboate bëltkriage addirittura vil mearar). Von zbuantzegar djar vort, soinda khent gemacht di earstn aroplé vor di läut zo viazàra, boda pinn djardar soin khent hërtä pezzar un sichrar, fin zo riva aft di aroplé bobar khennen un seng haüt. Pitt ditza sperare azta epparùmmaz habe darvërt eppaz naügez un azpar mang palle bidar åhevan zo viazàra, ombrómm ditza bòllat munen, ke disa situazióng, boda hatt gemacht stian letz vil läut, iz finalmente verte.

An gruaz,

Samuel Pedrazza